

鄒平縣志卷九

古蹟攷二

墳墓

古墓爲田昔人所慨荒原一抔土先民之形骸所
寄也故忠阡孝壟可溯流風豈徒麟卧秋烟令人
望窆臺而生感與夫表誌所以考信數百年中碣
斷碑殘存亡已有不可知者矣况年湮世遠哉茲
披尋漢唐元明古塚及

國朝位躋通顯者具錄其碑志以備一邑之故實

古

虞世子墓

在城東南一里許黃山西麓或疑爲古姚姓之君而訛爲世子也境內有魚子溝于茲山又有虞世子墓似是一字因虞世子而稱之者世遠俗訛無可考証

舊志

按鄒平爲鄒侯姚姓之國有虞氏後也虞世子墓或有由來然無可考証則疑以傳疑可耳魚子溝不在縣境中于茲山因于茲仙人而名各有緣起不得合而一之辨詳山水考

梁鄒侯墓

鄒平卽古鄒侯國有虞氏後墓在縣境安家莊城

子莊成家莊十里鋪南山下等處共十一所

山東通志

漢梁鄒侯墓志作鄒虎大王本邑始封之君墓在

城東南一里世稱陵寢後被僧徒混葬幸舊址尙

存明嘉靖二年巡撫陳名決按臨命同知李黼毀塔

徙骸故老傳鄒侯墓共十一所湮者三今存城東

南安家莊一城西北城子莊一成家莊一城西十

里鋪二城西南山下三

舊志

按有虞氏後爲鄒侯漢武虎爲梁鄒侯混而一

之非也考漢書功臣表武虎以高帝六年封梁
鄒侯至元鼎五年傳四世而國除元康四年虎
元孫之子夫夷嗣侯國公乘充竟詔復家梁鄒
侯傳國僅五六世而通志縣志皆云境內侯塚
有十一所其中有古鄒侯塚亦未可知歷年既
久無可攷據今存安家莊一城子莊一十里舖
二俱無碑碣

伏生墓

在城東北一十八里

舊志

伏生詳儒林傳舊祠建於墓前謁祭惟拜其肖像

墓則弗見也予於是秋捐俸同邑紳士耆民撤而
新之左立享堂右開墓道益以廂樓廣其繚坦一

宏規制焉

康熙三十四年
知縣程素期志

謹案城東北十八里伏子祠舊傳爲伏子故里
謂有墓者始於元張起巖修祠記祠墓間碑凡
舊碑十通元至順中修祠者一至正中建書院
者一明正統中修祠者一嘉靖中修祠者一

國朝順治間修祠者一改祠額者一康熙間修
祠者一已詳建置攷其餘皆詩刻也其書院則
創自元至明萬歷時朝議撤天下書院因之而

毀

初立伏子博士記畧

道光十六年續纂

嘉慶元年十二月署山東按察司孫星衍咨學院曹城言伏生鄭康成功在傳經當經在絕續之交較七十子爲難今世祠墓子孫現在本屬允宜會同貴院奏請予以曠典攷尙書出於伏生壁藏又口授其義始有今文尙書顯於世及孔壁得古文尙書孔安國以今文讀之其無今文可證者凡十六篇竟不能讀又無能注者謂之逸書存於故府今之孔傳校讀所上非孔壁古文朱文公疑之是漢無伏生則尙書不

傳傳而無伏生亦不明其義卽古文書後出孔壁無
伏生之今文亦不能識讀是伏生一人爲唐虞三代
微言道統之所寄今鄒平有宓氏諸城有伏生皆其
後也地方官自宜陳請增置五經博士以爲世職因
事關崇奉先賢本司不便專政爲此咨呈貴院挈本
司銜名具稿上聞 是月學院曹牌行濟南府五經
博士承襲定例由藩司核議詳請撫院具題咨部辦
理應飭地方官查明開造清冊妥議通詳因轉飭下
鄒平縣

嘉慶三年五月二十一日濟南府票下鄒平縣言五

月十二日布政司票開行查伏生後裔宓氏係鄒平縣人迄今日久未據詳覆合行飭催 是年十二月鄒平知縣李瓊林詳報濟南府知府金檠言據伏中興同伏敬祖呈伏生祠墓在鄒平城北十八里春秋官爲致祭伏生五世孫伏儒漢時遷東武卽今青州府屬也至元代有名伏步者爲伏生四十六代孫當元順帝末年因青屬兵荒遷鄒平城東北十八里伏生鄉康熙年前任程令選爲奉祀生者名伏永芳乃伏生六十一世孫也乾隆十一年前任雷令又選其六十二世伏繼宗之兄伏紹先爲奉祀生今紹先之

子伏中興係伏生六十三世孫年老務農不能承襲
惟有六十五世孫伏敬祖年甫十歲從師讀書克承
儒業縣內除伏繼宗伏中興伏敬宗三人外別無伏
姓則伏敬祖爲伏生本派似無疑義具文詳請上憲
察核

嘉慶五年四月巡撫部蔣 牌據縣詳伏氏祠墓子
孫俱在城北有無碑志書籍攷證其祠堂建始何年
現在作何修理墓道何所曾否設有奉祀生現在本
支人數若干均未查明聲叙轉飭詳細確切詳請察
奪 是年鄒平知縣李瓊林詳報濟南府知府德生

言祠之創建年遠莫稽墓前有元至順二年重修碑
張起巖撰文自元歷明以及國朝屢次重修並有
碑可攷縣志有墓有祠有書院書院久廢墓道碑在
縣東七里鋪大路北畔與墓南北相直十八里祠三
間東西書樓祭廳及大門尙在祠中祠在墓旁康熙
三十五年程令選伏永芳爲奉祀生有重修碑文可
據乾隆十二年雷令選伏紹先爲奉祀生有縣給印
札可據實未領有部照今伏敬祖紹先之曾孫也祖
父皆亡伏氏止有伏中興及伏敬祖一老一幼伶仃
孤獨如一綫之未絕並具冊結宗圖與碑文上報十

二月布政司全 據以詳巡撫部院惠

嘉慶七年山東巡撫和寧據布政司吳俊詳與學臣
劉鳳誥合詞具題請以伏勝六十五代孫伏敬祖充
五經博士禮部上議應如所請俟伏敬祖年及十五
以上給咨送部考驗如文理明順再行題請承襲咨
吏部給劄四月奉

旨依議欽此

嘉慶十年十二月禮部題今據山東署布政司詳言
伏敬祖年已十七歲例應給咨送部考試經臣部考
得文理明順與定例相符應與博士十二月十九日

奉

旨依議欽此

鄒平縣知縣董大醇伏氏世襲博士記畧言嘉慶
丙辰陽湖孫伯淵先生名星衍以充泲曹道署臬
篆檄查諸城鄒平伏生後人諸城旣無所攷而鄒
平僅有一丁守祠年耗且聾又無子王生啟運稔
其家世知伏氏有出爲人後者咨訪物色其家兩
代孀姑守一童纔七齡耳卽教以熟讀尙書急謁
前令李君復其宗又攷其世數詳請立爲博士會
伯淵以憂去官惟函致當道者踵成之壬戌無撫

軍和靜庵先生學使劉金門先生始合疏以請
旨允以伏敬祖爲五經博士乙丑春伯淵先生復
督漕山東急達司事者咨送禮部就試藉非伯淵
一人始終贊成之安見不或作而或輟邪是舉也
先生之功亦當並垂不朽云嘉慶十年六月前翰
林院庶吉士知鄒平縣董大醇

督學院錢 伏氏世系譜叙畧言孫伯淵因貢生
王啟運之請得立伏氏五經博士事詳鄒平令董
大醇記王生啟運稔伏氏家世求其後於將絕之
際教之學以顯於世而又爲之攷定其世系在敬

祖必能世其業乃爲伏氏之賢裔而王生則有功於伏氏者爲不少矣因爲之叙嘉慶十年九月督學使者錢樾

嘉慶二十二年丁丑鄒平知縣李文耕重修伏子祠旣成自作記曰伏夫子以傳經之功從祀兩廡舊矣而濟南鄒平城東北十八里爲夫子教授鄉里舊有專祠今

天子御極之十年冬又以夫子六十五代孫伏敬祖世襲五經博士奉其家祭厥典尤隆適

耕

之來祠半

傾圯爰始修葺集衆以義始工於丁丑之春及冬而

竣規制廣狹一仍其舊惟門之宜稱堂寢者擴大之
并別爲祠以遷祀鼂太常則視昔爲備夫有功德於
民則祀之重先儒嚴廟貌守主者之職也而監修募
助者其崇儒重義之心爲不可忘用垂於石以視來
者云

攷舊志徐侯政修祠成提學使施閏章愚山先
生爲作記言伏生像修眉廣額垂旒秉圭如古
侯幼女及鼂錯皆侍側縣有寫伏子授書圖者
昔或有妄說

舊圖今歸按官王家榕矣

胡渭拙明有言生已

年過九十計其女固非少艾教鼂何嫌卓哉斯

言可以解紛矣然古之賢后不嘗云吾不欲楚
楚與士人相對乎位置非宜謁祠者多有未愜
至程侯素期修祠自作記曰移女稍近示依父
也移鼃座稍遠示有別也攷其像塑中爲大龕
父在上女旁侍同在龕中鼃別在西楹之西負
北壁南向而坐受書狀歟退息狀歟旣兩無所
居又同在一室之中人心仍有未厭李復齋先
生別構一屋遷祀太常夫然後樞分內外人分
主客其歿其存羣情共帖乃得乎人心之所不
言而同然也